

ditum totus in Scriptura volvenda & commendanda occupatus, dignus tandem ab ordine suo ac superioribus habitus est, cui gradus DOCTORIS conferretur. Refugit illum primum LVTHERVS, verecundia quadam, & indignitatis suae obtentu, non ficto, sed serio, ut opus esset ad eum sperandum non unius viri adhortatione: Ita enim STAVPIZIVS, cujus nomen multas ob causas debet esse posteritati gratum, & cum honore commemorandum, varias rationes admovit ad eum impellendum, & cum suasiones non viderentur rem conficere, mandatum, cui refragari non posset per conscientiae ac voti legem, tandem interposuit. Inter alia *necessitates Ecclesiae* ante oculos stitit, & praetexenti *juventutem*, dixit, *Deum opus habere Doctoribus juvenibus in praesenti Ecclesiae statu*, qui strenue in ejus messe laborarent, & res satis collapsas restituerent. Excipienti suam *corporis imbecillitatem* atque imparitatem ad labores tot ferendos, quos honor ille secum ferat, metumque, ne forte ante tempus vitam spiritumque mittat: *Etiam Deum in coelis Doctoribus opus habere*, argute respondit. Tandem ubi de *sumtuum inopia* conquestus est, hunc etiam scrupulum ipsi exemit, & ex *Electoris Divi FRIDERICI*, Academiae Sapientissimi Conditoris ac *Nutritoris reditibus* omnem pecuniae summam esse numerandam, promisit. His arietibus tandem expulsus LVTHERVS resistere non potuit, sed obsequii, quod Deo, Principi & Superioribus debebat, probe memor, ad tantam rem se accinxit, pecuniamque Electoris clementissimo auspicio destinatam, Lipsiae, quorsum ea de causa proficisci jussus est, numeratam accepit. Ita honorem illum magis sibi imponi passus est, quam ut eum anxie ac laboriose ambiret, ipsoque die, qui Academiae